

四庫全書

集部

欽定四庫全書

集部

詩話總龜卷十三至  
六

詳校官侍郎臣劉躍雲

主事銜臣徐以坤覆勘

總校官編修臣倉聖脉

校對官中書臣李斯咏

謄錄監生臣薛炳文

欽定四庫全書

詩話總龜卷十三

宋 阮閱 撰

警句門中

楊文公云錢惟演劉筠首變詩格學者慕之得其格者  
蔚爲佳句二公麗語頗多如惟演奉使塗中云雪意  
未成雲著地秋聲不斷鴈連天又云容亭厭見名長  
短村酒那能辯聖賢送僧遊楚云宿舍孤煙起行衣  
夢雨涼張弁州詩云戈矛巡霧夕鐃鼓宴蕭晨章衢

雨詩云平檻曉波吳榜渡遶城春樹越禽飛章南安  
云離人南浦多春草越鳥棲枝有早梅劉潭州云坐  
激鮮飈湘竹曉樹含涼雨越禽歸李太僕比使云漢  
幟隨移帳燕鴻半解鞍何袁州云疎鐘靜起軍城晚  
華表雙高水國秋陳江陵云深沉蛛網通歸夢紫翠  
春山接去舟太乙宮云神庭古栢啼鳥起齋室虛簾  
宿霧通送人云思滿離亭酒魂驚客舍烏高泉州云  
東南地迴霄烽息西北樓高晚望迷章分寧云小雨

郊原連苦霧夕陽樓閣照丹楓東封應制云羽旄襄  
野駕宴喜魯郊民送予知處州云輕飈使車遠明月  
直廬空張僕射判河陽云綠野桑麻連四水黃堂歌  
吹擁千兵孫永興云魚尾故宮迷草樹龍鱗平隰自  
風煙漢武云立候東溟邀鶴駕窮兵西極待龍媒公  
子云歌番南國桃根曲馬過章臺杏葉鞦韆花云欲  
作飛煙散猶憐反照遲荷花云泪有鮫人見魂須宋  
玉招禁中鶴云天淵風雨多秋思遼海煙波失舊期

留題云有時盤馬看尤懶盡日投壺笑未迴又云春  
瘦已寬連理帶夜長誰有辟寒金元夜云九枝火樹  
連金秋萬里霜輪上壁璫馬延州云沃野桑麻涵細  
雨巖城鼓角送斜陽劉筠直禁中云雨勢宮城闊秋  
聲禁樹多陝州從事云角迴含秋氣橋長斷洛塵周  
賢良云崎嶇一乘傳憔悴五羊皮南鄭云渝舞氣豪  
傳漢俗丙魚味美敵吳鄉李太僕云惟月卿曹重占  
星使者賢送僧云捲衲城鐘斷搢筇岳雨寒僧惠崇

云醉令難同社仙鷺肯換書葉金華云柔桑蔽野鳴  
雛雉高柳含風變早蟬劉潭州云坐席久虛溫樹老  
心旌無奈楚風長又云沙禽兩兩穿鈴閣江草依依  
接射堂九隴云溪牋未破冰生硯爐酒新燒雪滿天  
又周賢良云春風亂鶯嘯夕霧一鴻冥張嶺南云山  
月愁揮子風濤怒鱷魚西巡云龍駕昌明御天旗太  
乙張祠婺神云大野幾星分婺女清風萬古感顏烏  
章南安云嶺雲夏變梅蒸早越雨秋藏桂蠹多西京

首坐云滎河帶繞中天閣空樂星懸大士居題雪云  
劉伶醉席梅花地海客仙搓粉水天利州轉運云鷓  
蹲野芋誰爲尹雪積泉鹽久置官章分寧云鶴伴鳴  
琴公事晚烏驚調角戍城秋楊處州云朱飾兩轡巡  
屬邑案留雙筆在中臺閣云三壤月臨承露掌九鷲  
烏繞守宮槐又云酒供硯滴濡毫冷火守更籌沃漏  
長雪月云已回鄰面三年粉又結寒絲幾許冰汾陽  
道中云鼓音記里繩阡遠舞節鳴鸞玉步隨相洪州



云桃葉橫波人共醉劍光衝斗獄常空李秦州云右  
城獨登宮雪密前旌雙抗嶺雲高劉潭州云洛田荒  
二頃楚浪漲三篙槿花云吳宮何薄命楚夢不終朝  
宮詞云難消守宮血易斷舞鸞腸又云虹跨層臺晚  
螢飛夏苑涼夏日云雲容倏變千峰險草色相沿百  
帶長新蟬云翼薄乍舒宮女鬢蛻輕全解羽人尸公  
子云行庖爨蠟彫胡熟永埒鋪金血汗驕明皇云梨  
園法部兼胡部玉輦長亭更短亭荷花云湔裙無限

水障袂幾多風留題云荷華出水終無定蘿蔓從風  
莫自持又云藻井風高蛛壞網杏園春暖燕爭泥咏  
梨云先時櫻熟煩羊酪遠信梅酸損瓠犀洞戶云容  
鎖香風深處戶亂飄梨雪曉來天贈希晝云吟餘雲  
散葉坐久塵遺毛夕陽云塞迴橫垣紫江清照葉丹  
園中云籠禽思隴樹洞犬識秦人柳絮云平沙千里  
經春雪廣陌三條盡日風高屬疾云風簾鷓笑厨烟  
絕月樹烏驚藥杵喧燈夕云金門水動浮壺箭玉宇

風來落砌莫禁中云萬年宮省樹五色帝家禽

晚唐詩句尚切對然氣韻甚卑鄭縈山居云童子病歸  
去鹿麕寒入來自謂銖兩輕重不差有人作梅花云  
強半瘦因前夜雪數枝愁向曉來天對屬雖徧亦有  
佳處

李廷老家有李揆與饒州刺史封漸仲容叔霽聯句揆  
筆力道勁詩亦大佳略云暫踐蓬瀛閣卧病淮海濱  
偶同鄱陽守宛是鄱陽人又云共仰新侯伯同瞻舊

宰臣又云鄉路轅思北客林巷喜南

王爽字季明王孝伯問曰古詩中何句爲最佳爽未對  
孝伯曰所遇無故物安得不速老此爲佳

揚巨濟詩曰爐煙添柳重宮漏出花遲當以下句爲試  
舉人詩題濟本作源

晏元獻稱國初待詔云醉輕浮世事老重故鄉人張安  
道亦稱紅塵三尺險中有是非波

晏臨淄宴集詩最多有一聯云春風任花落流水放杯

行

惠崇遊長安云人遊曲江少草入未央深不減馬放降  
來地鷗盤戰後雲

景祐三年後苑生雙竹宣宰相從臣賦詩知制誥李絢  
有詩云日迴龍並影風過鳳睒聲衆嗟賞之

前並  
詩史

嘗和杜祁公致仕詩云收得桑榆歸物外種成桃李滿

人間亦佳

雲齋  
廣錄

李元膺遊春詩云夾道桃花三月暮馬蹄無處避殘紅

具標致如此

陳臺杜默預東平郡宴太守請賦海棠詩默云倚風莫

怨唐工部後裔寧知不解詩坐客歎服

詩史

臧謀梅花詩云綠楊解語應相笑漏洩春光却是誰人  
皆誦之

淇川人楊萬畢字通一作聞梧桐夜雨詩云千里暮雲  
山已黑一燈孤館酒初醒索寞之意盡於此

華州華陰縣宰許弋於縣解闕一軒名曰增明取韓文

公遙岑出寸碧遠目增雙明之意羽客姚太虛謁許  
公因書云遙岑寸碧尚增明何況雲峰三十六

楊茂卿詩云河勢崑崙遠山形菡萏秋誠佳

錢昭度燈詩云繡帔夢驚中酒處朱門人語上朝時未  
若船中聞鴈洞庭夜牀下有蛩長信秋意格清遠

昭度又有聞角詩云風欲拋高雨壓沉黃昏前後五更  
深議者云此亦句之優者

王文穆罷相帥朝士皆有詩陳從易詩最佳云千重浪

裏平安過百尺竿頭穩下來

景祐末元昊叛富鄭公守長安梅聖俞送詩云亞夫金鼓  
從天落韓信旌旗背水陳鄭公獨刺此詩于石

范景仁喜爲詩年六十三致仕一朝思鄉里遂輕行入  
蜀故人李才元知梓州枉道過之歸至成都日與鄉  
人樂飲散財於親舊之貧者遂遊峨嵋青城下巫峽  
出荆門歲暮乃還京師在道作詩二百五篇有云不  
學鄉人誇駟馬未饒吾祖泛扁舟此一二事他人所



不能用也

范希文於江上見一漁父意其有德隱者也問姓名不  
對但留一絕云十年江上無人問兩手今朝一度叉

並同

前

閩嶺孟貫爲性疎野不以名宦爲意喜篇章大諫楊徽  
之稱之如寄張山人草堂云掃葉林風後拾薪山雨

前

韓襄客者漢南女子爲歌詩知名襄漢間孟浩然贈詩

曰只爲陽臺夢裏狂降來教作神仙客襄客閨怨詩  
曰連理枝前同設誓丁香樹下共論心先公熙寧中  
遘虜使成堯錫見遺衣服刺此聯於裹肚上其下復  
刺丁香連理男女設誓之狀虜人重此句爲佳製詩史

開元中將軍宋清有神劍後爲瓜州牧李廣琛所得哥  
舒翰求之廣琛不與贈詩曰刺舟尋已化彈鋏示恩

酌南  
部

廬阜人陳況立性僻野不接俗士黃損熊皎虛中師事

之寒食後云罷却兒女戲放他草木生閒居云掃地  
雪粘笻耕山鳥怕牛題水云點入旱雲千國仰力淳  
塵世一毫輕齊已贈沈云四海方磨劍深山自讀書

雅言

張觀性沈靜未嘗草書自詠曰保心如止水為行見真

書以為著題

桂苑  
雜錄

太上隱者人莫知其本末好事者從問其姓名不答留  
詩一絕云偶來松樹下高枕石頭眠山中無歷日寒

盡不知年

古今  
詩話

宋之問貶黜放還至江南遊靈隱寺夜月極明長廊行  
吟曰鷲嶺鬱峯堯龍宮隱寂寥未得下聯有老僧燭  
燈坐禪問曰少年不寐而吟諷甚苦何耶之問曰欲  
題此寺而思不屬僧曰試吟上聯之問誦之曰何不  
道樓觀滄海日門對浙江潮之問終篇曰桂子月中  
落天香雲外飄捫蘿登塔遠剝木取泉遙雲薄霜初  
下冰輕葉未凋夙齡尚遐異披對滌煩翳待入天台  
路看余渡石橋僧一聯乃篇中警策也遲明訪之

已不見寺僧曰此駱賓王也

張俞成都人蜀以賢良稱之有詩行於世題武侯廟云  
高光如有嗣吳魏豈勝誅又題御愛山云可勝亡國  
恨猶有愛山心題洞庭湖云萬頃碧波看不盡一拳  
孤岫望中明皆佳

劉夢得有獨吟曰巴人淚逐猿聲落蜀客舟從鳥道來  
姚合道旁亭子詩云南陌遊人回首去東林道者杖藜  
歸不言亭亦佳

王摩詰酷好畫山水其畫山聳谷邃雲浮水飛意出塵外嘗自題云宿世吟詩客前身應畫師李璟定爲妙

品上上

同前

李益詩名有著征人早行篇好事者畫爲圖障如回鴈峰前沙似雪受降城下月如霜天下歌之

胡擢詩善狀花木鳥獸飄然有物外意嘗謂人曰吾思若於三峽聞猿吟曰甕中每醞道遙樂筆下閒偷造

化工

唐南蠻侵軼西川僖宗幸蜀慮爲患以女下降蠻喜其  
姻聯大國遣宰相趙降眉楊竒鯤段義宗來朝行在  
高駢自淮海飛章云南蠻心脅唯此數人請留異待  
之迄僖宗還京無虞用駢計也楊趙輩各有詞藻迹  
中云風裏浪花吹更白雨中山色洗還青海鷗聚處  
窗前見林狖啼時枕上聽

自唐以來試進士詩號省題時有佳句如梓州進士楊  
諤天聖八年省試蒲車詩云草木驚皇轍山川護帝

輿是歲下第景祐元年省試宣室受釐詩云願前人  
主席一問洛陽人是歲及第未幾慶厯二年韓欽試  
勲門賜戟詩云凝鋒畫翻轉交鏃采文繁范景仁曾  
見真本云迎鋒畫翻轉映日采文繁姑兩存之蘇州  
進士王偃試邇英延講藝詩云白虎前芳掩金華舊  
事輕天心非不悟垂意在蒼生有古諷諫意是年奏  
名甚高御前下第二十年始第尋卒滕元發皇佑五  
年御試吹律聽軍聲詩云萬國休兵外羣生奏凱中



又作西旅來王詩云寒日邊聲斷春風塞草長傳聞  
漢都護歸奉萬年觴極爲場屋所稱揚諤有題驪山  
云行人問宮殿耕者得珠璣

孟蜀王時花蕊夫人能詩而世不傳王平甫於館中得  
七言三十餘篇大約似王建詩云厨舩進食簇時新  
列座無非侍從臣日午殿頭宣索繪隔花催喚打魚  
人又月頭分給買花錢滿殿宮娥盡十十遇着唱名  
多不語含羞急過御牀前

並同前

楊文公在館閣時占城進獅子例進詩文公云渡海鯨

波息登山豹霧清

雜說

章獻太后挽辭數百首唯石曼卿一聯首出曰震出坤

柔變乾成太極虛太后稱制日久仁宗端拱至是始

親萬機曼卿詩切合時宜又不卑長樂也

古今詩話

嘉祐中劉諷都官簡州人方年六十三致仕夫婦徙居

於山謝景山有詩送云移家尚恐青山淺隱几唯知

白日長朱公綽詩云諫草焚來應見史橐金散盡只

留書

潘天錫員外與沈郎中宅相隣同遊古觀分題天錫云

風便磬聲遠日斜樓影長沈彬云松歌晚影離壇草

鐘撼秋聲入殿風

郡閣雅談

唐宣宗重陽賜羣臣宴詩曰款塞旋征騎和戎委廟賢

傾心方倚注協力共安邊魏暮應制云四方無事去

神豫杪秋來八月寒光動千山霽色開宣宗嘉之

南部

新書

魏野啄木云千林啄如盡一腹餒何妨有詩人規戒之  
風間居云妻喜栽花活童誇鬪草羸得野人趣非急  
務故也又云燒葉爐中無宿火讀書窗下有殘燈有  
嫌燒葉貧寒太甚改葉爲藥不惟壞此一句并下句  
亦減氣味所謂求益反損也贈司馬君實云文雖如  
貌古道不似家貧公監安豐酒稅赴官有行色贈云  
冷於陂水淡於秋遠陌初窮見渡頭猶賴丹青不能  
畫畫成應遣一生愁非狀難寫之景乎

寇萊公年十九進士及第知巴東縣詩云野水無人渡  
孤舟盡日橫又爲江南春詩云波渺渺柳依依孤村  
芳草遠斜日杏花飛江南春盡離腸斷蘋滿汀洲人

未歸膾炙人口

古今詩話

李長吉歌云天若有情天亦老以爲奇怪無對石曼卿  
云月如無恨月長圓

九華山人熊皦能詩早行云山前猶見月陌上未逢人  
山居云果熟秋先落禽寒夜未棲閒居云深逢野草

皆爲藥靜見樵人恐是仙又云厭聽啼鳥夢醒後慵

掃落花春盡時

雅言  
雜載

李範關中人善章句爲道傍水云雖當南北路不碍往  
來人經王山人舊居云鶴歸秋漢遠人去草堂空秋  
日江干遠望云清猿啼遠木白鳥下前灘暮秋懷故  
人云天涯故友無來信窗外拒霜空落花江寺閒書  
云釣叟無機沙鳥睡禪師入定白牛閒

同前

丁晉公任朱崖有詩數十篇號知命集有曰草解忘憂

憂底事花名含笑笑何人

古今詩話

陸子履言懷云薄有田園歸去好苦無官况莫來休士

君子莫不賞味其意

青瑣集

湘南詩僧文喜爲失鶴詩云一向亂雲尋不得幾番臨  
水待歸來上潭州劉相大稱許

河外僧清晤春日即事云宿鳥歸花影潮魚沒浪痕郊  
外晚行云疊浪支層漢殘陽補斷霞上賈侍中遂褒  
稱

范攄有子七歲能詩夏景云閒雲生不雨病葉落非秋  
方干曰必不享壽未十歲而終

劉昭禹字休明婺州人爲詩刻苦不懼風雨有云句向

夜深得心從天外歸言不虛耳

並同前

廖凝字熙績十歲詠白詩云滿汀鷗不散一局黑全輸

作者見之曰必垂名於後

郡閣雅談

裴說裴諧俱有詩名說官至補闕諧終於桂嶺假官宰  
自作湘江吟說詩云吟餘潮入浦坐久燒移山諧詩



云風回山火斷潮落岸冰高經杜甫墳說云擬掘孤墳破重教大雅生諧曰名終埋不得骨且朽何妨景同而語意俱別

呂文穆公未第時嘗遊一縣志其縣名胡大監旦方隨其父宰是邑遇呂甚薄客有譽曰工於詩宜少加禮胡問其警句客舉一篇卒章云挑盡寒燈夢不成胡笑曰乃一渴睡漢耳呂恨而去明年省中甲科因人寄語胡曰渴睡漢狀元及第胡荅曰待我明年第二

人及第輸君一籌既而次榜亦中首選

歐公詩話

許致殿丞及第後忽心恙爲詩亂題房壁云有漏難成佛無機好學禪又江上對月云江使不來秋練淨月娥長在夜珠寒

詩話總龜卷十三

欽定四庫全書

詩話總龜卷十四

宋 阮閱 撰

警句門下

石曼卿以詩酒豪爽得名嘗獨行京師條有豪士揖曼卿語已而曰公幸過我家曼卿語諾豪士顧從騎載曼卿同行入委巷前抵大第三四門乃至內堂庭戶宏麗施設錦繡侍女珠翠延飲求曼卿書字曼卿寫已書其詩籌筆驛等數篇豪士甚珍愛之贈曼卿金

帛可直數十百千使從騎送歸初不知其誰何後日  
尋迷不省所居閭里人不能知他日復遇之塗又以  
金數十兩贈曼卿云籌筆驛詩意中流水遠愁外舊  
山青最佳

歐陽詹乾德中獻野史受黃崗宰有詩行於世聞猿云  
啼猿非有恨行客自多悲聞笛云不知吹者意何似  
聽人心卧屏云橫琴遮遠洞舉手出高峰公宇蘆云  
漁家合得兩三莖公退徐吟思倍清官滿不將歸舊

隱蕭蕭留與後人聽

雅言  
雜載

繆島雲少從浮屠詩尚竒險如拋芥子降顛佛佛折楊

枝灑醉猩猩負出前輩

撫  
言

湖南日試萬言王璘與李羣玉校書相遇於岳麓寺群

玉揖之曰公何許人日試萬言不答羣玉曰與公聯

句可乎璘曰惟子之命羣玉破題授之曰芍藥花開

菩薩面璘繼之曰梭擱葉散夜叉頭

東坡云兒子邁幼嘗作林檎詩云熟果無風時自脫半

窗迎日鬪先紅於等輩中亦號有思致者今已老無  
他技但時出新句作酸棗尉有詩云葉隨流水歸何

處牛載寒鷄過別村

百斛明珠

眉山矮道士李伯祥好爲詩格亦不能高往往有奇語  
如夜過脩竹寺醉打老僧門皆可愛予幼時學於道  
士張易簡觀中伯祥與易簡往來嘗歎曰此郎君貴  
人也不知何以知之

同前

狄煥南岳石樓曉望云數點當秋霽不知何處峰題岳

路松云一嶂雨聲歸洞壑兩條翠色下瀟湘

雅言  
系述

曾弼長沙人依逸人王元爲詩友宿玉泉寺云山偷半  
庭月池印一天星君山云翠壓魚龍窟寒堆波浪心  
蔣鈞字不器營道人與劉洞陳甫爲詩友寄柳宣云因  
借夢書過竹寺學耕秋粟繞茹原戎昱詩有一夜不  
眠孤客耳主人門外有芭蕉鈞代答云芭蕉葉上無  
愁雨自是多情聽斷腸

史虛白嵩洛人廖凝寄之詩曰飯僧春嶺蕨醒酒雪潭

魚終於湓浦

林楚才賀州富川人贈致仕黃損詩云身閒不恨辭官  
早詩好常甘得句遲

陳甫字惟岳吉水人贈黃岩云清時不作登龍客綠鬢  
閒梳傍草堂漳江感懷云一雨洗殘暑萬家生早涼  
村居云暮鳥歸巢急寒牛下隴遲詩云筭吟千百首  
方得兩三聯

僧祖可蘇伯固之子懷蘭江云懷人更作夢千里歸思



欲迷雲一灘贈端師云窻間一榻篆煙碧門外四山  
秋蕊紅

張子野有隔牆送過鞦韆影雲破月來花弄影浮萍開  
處見山影宋景文一日訪之通曰來訪三影郎中子野  
喜曰是紅杏枝頭春意鬧尚書耶

周朴賦董嶺水一聯云禹力不到處河聲流向西一士  
跨蹇過其前故吟曰禹力不到處河聲流向東亟鞭  
而去朴追數里及之曰此僕句作西乃佳耳

東坡至西太一見荆公詩柳葉鳴蜩綠暗荷花落日紅  
酣三十六陂春水白頭相見江南二十年前此地父  
兄持我東西今日重來白首欲尋舊迹都迷注目久  
之曰此老野狐精也

永叔云吾嘗愛常建曲徑通幽處禪房花木深欲效其  
語作一聯久不可得始知造意者為難工也來青州  
得一山齋不意平生想見而不能道以言者乃為已  
有於是益希其髣髴竟爾莫獲一言

皮日休孟亭記云北齊美蕭愨芙蓉露下落楊柳月中  
踈先生則有微雲淡河漢踈雨滴梧桐樂府美王融  
日霽沙嶼明風動甘泉濁先生則有氣蒸雲夢澤波  
撼岳陽城謝朓之詩句精者露濕寒塘草月映清淮  
流先生則有荷風送香氣竹露滴清響此與古人爭  
勝於毫釐也

荆公在金陵嘗指壁上所題兩句云一水庫一云護田將

綠遶兩山排闥送青來

張埴字叔和謂余曰埴一日到洛中謁潞公方飯後坐於一亭亭邊皆蘭既見不交一談對坐幾時公方曰香來也叔和以爲平生所未聞潞公云凡香嗅之則不佳須待其因風自至余始悟山谷詩云披拂不盈懷時有暗香度

韓持國有云青烟人幾家綠野山四合當時無不傳誦東坡云參寥善絕句有云隔林彷彿聞機杼知有人家在翠微每爲人誦後來黃州相聚半年京師故人以

書相遺曰知有僧在彼非隔林彷彿聞機杼和尚耶  
僕謂參寥曰此吾師七字師號也

梅聖俞在禮部考校時和歐陽文忠公春雪詩云有夢  
皆蝴蝶逢袍只紵麻用事如此乃可貴

余愛張文潛過宋都詩云白頭青鬢有存沒落日斷霞  
無古今不減老杜

山谷有光山道中雪詩云山啣斗柄三星沒雪共月明  
千里寒都尉王晉卿足成鷓鴣天云才子陰風度遠

關清愁曾向畫圖看山  
嶺斗柄三星沒雪共月明千  
里寒新路陌舊江干崎嶇  
誰歎客程難臨風更聽昭  
華笛款款梅花滿地殘

舒王與吳彥律云含風鴨綠鱗鱗起  
弄日鶯黃裊裊垂  
自云此幾凌轢造物

張文潛謂余曰黃九云桃李春風一  
盃酒江湖夜雨十

年燈真奇語

並同前

詩云千山送客東西路一樹照人  
南北枝王康功推官

作

牛丞相奇章公初爲語矜奇特語至有地瘦草叢短句  
明年秋卷成呈之曰有求色必報憑酒意乃伸益加  
能矣明年乃上第因曰楊茂卿云河勢崑崙遠山形  
齒齒秋此過華陰山下作初用蓮峰作齒齒的當而

暗盡矣

劉禹錫  
佳話錄

蜀王建時楊義方能文詞爲春日詩云海邊紅日半離  
水天外暖風輕到花贈王樞密云雨聲鞭自禁門出

一族人從天上來

異聞錄

唐求劉郇伯有詩名唐求臨池洗硯詩云恰似有龍深處卧被人驚起黑雲生又漸寒沙上路欲暝水邊村早行云沙上鳥猶睡渡頭人已行詩思不出二百里間劉郇伯爲范鄭郎中詩友范得句云歲盡天涯雨久而難對劉郇伯曰人生分外愁范賞之然老於新津之東渡非隱非吏二子亦可凌厲名場而死邱樊

所謂蜀人無志懷土正此也

北夢瑣言



余問山谷今之詩人誰爲冠曰陳無已其佳句可得聞乎曰吾見其作溫公挽辭一聯便知其才不可敵曰政雖隨日化身已要人扶

盛次仲孔平仲同在館中雪夜論詩平仲曰當作不經人道語曰斜拖闕角龍千尺澹抹墻腰月半稜次仲曰甚佳其未大乃曰看來天地不知夜飛入園林總是春平仲乃服

並同前

舒王嘗寄蔣山元禪師詩曰不與物違真道廣每隨緣

起自禪深

冷齋  
夜話

唱和門

熙寧間初作東西府望氣者云有天子氣及府成車駕  
果幸張挾以詩慶二府諸公荆公和云曾留上主經

過迹更費高人賦詠才

倦游  
錄

唐路德延有孩兒詩五十首傳於世侍郎張公師錫次  
韻成老兒詩曰鬢髮盡皤然眉分白雪鮮週迴延客  
話僂僂抱孫憐無病常供粥非寒亦衣綿假溫衾擁

背借力杖搯肩貌比三峰老年過四皓仙喚方離枕  
上扶始到門前每愛烹山茗嘗嫌釘石蓮耳聾如塞  
續眼暗似籠煙宴坐羸扶几乘騎困鞞鞭頭搖如轉  
旋唇動若抽牽骨冷愁離火牙疼怯漱泉形骸將就  
木囊橐尚貪錢膠睫乾眇綴粘髭冷涕懸披裘腰懶  
繫濯手袖慵揜抬舉衣頻換扶持藥屢煎坐多茵易  
破行少履難穿喜婢裁裙布嗔妻買粉鈿房教深下  
幕牀遣厚鋪黏琴聽憐三樂圖張笑七賢看經嫌字

小敲磬喜聲圓食罷羨流袂盃餘酒帶涎樂來須報  
罷醫到久相延畏帽縱橫掠梳頭取次纏長吁思往  
事多感聽哀絃氣注腰還重風牽口更偏墓松先遣  
種誌石預令鐫客到唯求藥僧來忽問禪養茶懸土  
竈曝艾晒簷椽怒僕空睜眼嗔童謾握拳心驚嫌踣  
蹴脚軟怕鞦韆局縮同寒狄推壓似餓鳶觀瞻多目  
眩舉動即頭旋女嫁求紅燭男婚乞彩牋已聞頒几  
杖寧更佩韋弦賓客身非與兒孫事已傳養和屏作

伴如意佛相連久棄登山屐  
惟存負郭田呻吟朝不  
樂展轉夜無眠呼稚臨牀  
伴看書就枕邊冷懷疑貯  
水虛耳訝聞蟬束帛非無  
分安車信有緣伏生甘坐  
末絳老讓行先拘急將風  
夜昏沉欲雨天雞皮塵旋  
滑兒齒食頻填每憶居郎  
省常思釣渭川喜逢迎佛  
會羞赴賞花筵徑遠令移  
檻堦危索減磚好生焚烏  
網惡殺杵魚船既感桑榆  
日常嗟蒲柳年長思當弱

冠悔不勝狂顛

青箱  
雜記

牛僧孺將赴舉時投贖於劉夢得對客展讀飛筆塗竄  
其文居三十年夢得守汝牛出鎮漢南枉道汝水雕  
旌信宿酒酣贈詩於夢得曰粉署爲郎二十春向來  
名輩更無人休論世上升沉事且問尊前見在身珠  
玉會應成咳唾山川猶覺露精神莫嫌恃酒輕言語  
曾把文章謁後塵夢得方悟往年改文卷之事和答  
云昔年曾忝漢朝臣晚歲空餘老病身初見相如成  
賦日後爲丞相倚門人追思往事咨嗟久幸喜清風

語笑頻猶有當時舊冠劍待公三日拂埃塵

古今詩話

長慶二年錢起自中書舍人知舉放進士周墀及第後  
同在翰林會昌三年起自僕射再放榜時周墀任華  
州因寄詩賀叙同在翰林日文場三化魯儒生二十  
餘年振重名曾忝木雞誇羽翼又陪金馬入蓬瀛雖  
欣月桂居先折更羨春蘭最後榮欲到龍門看風水  
闕防不許暫離營答曰貢院離來二十霜誰知更忝  
主文場楊葉縱能穿舊的桂枝何必授清香九重每

憶同仙禁六藝初吟得夜光莫道相如不相見蓮峰

之下有龔黃人以為絕唱

廣卓  
異記

韋中憲蟾廉問鄂州春日除祖筵上題文選兩句云悲  
莫悲兮生別離登山臨水送將歸以毫牋授賓從請  
續其句坐中悵望久之屬有酒妓泣然曰某不知欲  
口占兩句乃曰武昌無限新開柳不見楊花撲面飛  
坐客嘉歎韋有贈龔僧詩云岵嶺東西烟靄合兩間  
茅屋一溪雲僧云師童誰解知師意人是人非不欲



聞

雅言  
雜載

曹相確鎮浙西日會湖中郡判官王樞舉進士嚴憚詩  
曰春光冉冉歸何處更向花前把一盃盡日問花花  
不語爲誰零落爲誰開王抑其才調和曰花落花開  
人世夢哀榮間事且持盃春風底事輕搖落何似從  
來不要開

同前

龔穎自負文學少許可又談論多所折難知鼎州士罕  
造其門獨丁晉公贄文求見穎倒屣迎迓酌對終日

至於忘食曰自唐韓柳後今得子矣翌日丁獻詩於  
穎穎次韻和酬曰膽怯何由戴鐵冠只緣昭代獎孤  
寒曲肱未遂違前志直指無聞是曠官三諫每傳朝  
客說五溪閒凭郡樓看祝公早得文場雋况值天堦

正舞干

青瑣  
雜記

江西韋丹大夫與僧靈徹爲忘形之契寄徹詩云王事  
紛紛無暇日浮生冉冉只如雲已爲平子歸休計五  
老峰前必共論徹酌曰年老身閒無外事麻衣草坐

只容身相逢盡道休官去林下何曾見一人

雲溪友議

白中令鎮荆南杜蘊常侍問長沙諸從事盧發致聘焉  
發酒酣傲睨公少不懌因改著詞令曰十姓胡中第  
六胡也曾金闕掌洪爐少年從事誇門地莫向尊前  
喜氣粗盧荅曰十姓胡中第六胡文章官職勝崔盧  
暫來闕外分優寄不稱賓筵語氣粗公極歡

撫言

梅聖俞客歐陽晦夫使工畫茅庵已居其中一琴橫牀  
而已曹子方作詩四韻僕和云寂寞王子猷迴舫剡

溪路超遙戴安道月夕誰與度倒披王恭氅半掩裘

安戶應調折弦琴自和撚鬚句

百斛明珠

東坡云余在廣陵與晁無咎曇秀道人同舟送客山光寺客去余醉卧舟中秀作詩云扁舟乘興到山光古寺臨流勝氣藏慚愧南風知我意吹將草木作天香予和云開裏清遊似隙光醉時真境發天藏夢回拾得吹來句十里南風草木香余昔對文忠公誦文與可詩云美人却扇坐羞落庭下花公曰此非與可詩

世間元有此句與可拾得耳後五年秀來惠州見予

偶道其事

直方  
詩話

鄧洵美連山人乾祐二年中進士第與司空昉少保傅  
同年謁劉氏不禮歸武陵時周氏有其地且辟在幕  
府未幾司空氏自禁林出使武陵與洵美相遇贈詩  
曰憶昔詞場共着鞭當時鶯谷喜同遷關河契濶三  
千里音信稀踈二十年君遇已知依玉帳我無才藻  
步花磚時情人事堪惆悵天外相逢一泫然洵美和

云詞場幾度讓長鞭又向清朝賀九遷品秩雖然殊  
此日歲寒終不改當年馳名早已超三院侍直仍忻  
步八埒今日相逢番自愧閒吟對酒倍潸然相國歸  
闕率偕載而辭以疾不行相國語同年少保公公時  
在黃閣洵美在武陵又爲詩寄之云衡陽歸鴈別重  
湖銜到同人一紙書忽見姓名雙淚落不知消息十  
年餘綵衣我已登黃閣白杜君猶葺舊居南望荆門  
千里外暮雲重疊滿晴虛周氏疑洵美漏洩密謀急

追捕至易俗場而遇害建隆初王師下湖湘相國復  
收衡陽道經易俗場作詩弔曰十年衣染帝鄉塵踪  
跡仍傳活計貧高掇桂枝曾遂志假拖藍綬至終身  
侯門寂寞非知己澤國恓惶似旅人今已向公墳畔  
過不勝懷抱暗酸辛

雅言  
系述

山谷云金華俞清老名子中三十年前與予共學於淮  
南元豐甲子相見於廣陵自云荆公欲使之脫縫掖  
着僧伽藜奉香火於半山宅寺所謂報寧禪院者予

之僧名紫琳字清老無妻子之累去作半山道人似  
爲不難事然生龜脫筒亦難堪忍後數年見之儒冠  
自若因嘗戲和清老詩曰索索葉似雨月寒遙夜闌  
馬嘶車鳴鐸羣動不遑安有人夢超俗去髮脫儒冠  
平明視清鏡政爾良獨難子瞻屢哦此詩以爲妙

直方

詩  
話

乾祐元年戶部侍郎王仁裕放王溥狀元及第溥不數  
年拜相仁裕時爲太子少保有詩賀曰一戰文場拔



趙旗便攜金鼎替無爲白麻驟降恩何厚黃閣初聞  
喜可知跋勅案前人到少築沙堤上馬行進押班長  
幸遙相見親狎爭如未貴時溥和曰揮毫文戰偶蹇  
旗待詔金華亦偶爲白杜遽當宗伯選赤心旋遇聖  
人知九霄得路榮雖極三接承恩出每遲職在台司

多少暇親師不及舞雩時

廣卓  
異記

魯直使余對句曰呵鏡雲遮月對曰啼妝露著花魯直  
罪余於詩深刻見骨不務含蓄余竟不曉此論當有

知者同  
前

詩話總龜卷十四

欽定四庫全書

詩話總龜卷十五

宋 阮 閱 撰

留題門上

呂申公累乞致仕仁宗不允他日復叩便坐度其不可  
留因詢曰卿去誰可代者申公曰知臣莫如主陛下  
自擇堅問之乃引陳文惠曰陛下必欲得英俊經綸  
之臣則臣所不知若圖任老臣鎮安百度周知天下  
事無如陳堯佐仁宗然之文惠遂大拜極懷薦引之

德因作燕詞攜酒過之申公使之歌焉詞云二社良  
辰千家庭院翩翩又見新歸燕鳳凰巢穩許爲鄰蕭  
湘烟暝來何晚亂入紅樓低飛綠岸畫梁時拂歌塵  
散爲誰歸去爲誰來主人思重朱簾捲申公笑曰自  
恨捲簾人已老文惠曰莫愁調鼎事無功老於廊廟  
而醞籍不減昔任浙曹有吳江詩曰平波渺渺煙蒼  
蒼菰蒲纔熟楊柳黃扁舟繫岸不忍去秋風斜日鱸  
魚鄉又碧瀾堂詩云蒼溪清淺雲溪斜碧玉寒光照

萬家誰與月明終夜聽洞庭漁笛隔蘆花

古今詩話

徐州漢興歌風臺詩雖多張安道詩最絕云落魄劉郎  
作帝歸樽前一曲大風詞才如信越猶菹醢安用思

他猛士爲

青箱雜記

臨潼朝元閣詩雖多唯陳文惠二韻首出曰高閣高何  
迴秋毫無隱情浮雲忽一蔽不見洛陽城

張退傅宰邵武時多遊僧舍至則吟詠忘歸題西庵寺  
曰西庵深入西山裡笑得當年少客遊密密石叢蟠

小徑涓涓雲竇瀉寒流松皆有節垂青蓋僧盡無心  
也白頭欲刷粉碑書好字調卑官冗不堪留題寶蓋  
巖寺云身爲冠冕流心是雲泉客每到雲泉中便擬  
忘歸迹况此寶蓋巖天造清涼宅稅車官道邊誰知  
願言適過建寧縣洛陽村曰金谷花時醉幾場舊遊  
無日不思量誰知萬水千山裡枉被人言過洛陽

前

並同

張伯玉過姑熟見太白十詠不及明月泉因題一絕

曰至今千古松猶伴數峰雪不見纖塵飛寒泉湛明  
月

陳文惠至古寺作詩曰殿古寒爐空流塵暗金碧獨坐

偶無人又得真消息

春明退  
朝錄

顏謝魯公之後所居有泉石松竹創亭延客孟賓于留

題詩曰園林瀟灑聞來久欲往因循二十秋今日開

襟吟不盡碧山重叠水長流

江南  
野錄

陳穎南昌人業進士題漢祖廟曰項羽英雄猶不懼可

憐容得辟陽侯得狂病而卒

同前

長安慈恩寺浮屠前後題詩多矣唐文宗朝元微之白

樂天到塔下見章八元所留詩悉令除去諸家牌惟

留章詩詩云十層突兀在虛空四十門開面面同却

怪鳥飛平地上自驚人語半天中回梯暗踏如穿洞

絕頂初攀似出籠落日鳳城佳氣合滿城香樹雨濛

濛

鑑戒錄

雍陶典雅州送客至情盡橋改爲折柳橋題詩曰從來



只有情難盡何事名爲情盡橋自此改名爲折柳從  
他離恨一條條

施肩吾題友人閒居詩曰花眼綻紅斟酒看樂心抽綠  
帶煙鋤

夫差廟拆姑蘇臺木創成陳羽題詩曰姑蘇臺畔千年  
木刻作夫差廟裡神幡蓋寂寥塵土滿不知簫鼓樂

何人

並同前

陳羽姑蘇臺詩云憶昔吳王爭霸日歌謠滿路上蘇臺

三千宮女看花處人盡臺空花自開

賀程詠君山詩曰曾遊方外見麻姑說道君山此本無

云是崑崙山頂石海風吹落洞庭湖

錄 鑑戒

劉象詠仙掌詩曰萬古亭亭倚碧霄不成擎亦不成招

何如掬取蓮池水洒向人間救旱苗

同前

砌臺即今擦擦臺也王侯家作以爲臨觀之戲唐張素

詩云寫望臨香閣登高下砌臺林間踏青去席上意

錢來即知唐來有之太祖朝大王都尉家其子承裕

幼時其父戲補砌臺使

談苑

楊文公罷虔州過饒州餘干縣登干越亭前瞰琵琶洲  
後枕思禪寺天下絕境古今留題百餘篇張祐詩云  
扁舟亭下駐煙波十五年游重此過洲紫露沙人渡  
淺樹梢藏竹鳥啼多層瀾漲水痕猶在石板題詩字  
已訛况是高秋正圓月可堪聞唱異鄉歌劉長卿云  
天南愁望絕亭下柳條新落日獨歸鳥孤舟何處人  
生涯投越嶠世業陷胡塵草色迷征路鶯啼傍逐臣

秦臺悲白首楚渚怨青蘋  
杳杳鍾陵暮悠悠鄱水春  
獨醒翻取笑直道不容身  
得罪風霜苦全生天地仁  
青山數行淚滄海一窮鱗  
流落機心盡空憐鷗鳥親

談苑

江遵詠史云秦築長城比鐵牢  
蕃戎不敢過臨洮雖然  
萬里連雲際不及堯堦三尺高  
何光遠稱此詩卓絕

千百集中無以加

詩史

桂州左右山皆平地  
拔起數千百丈石如染黛  
陽朔縣

尤佳沈彬有詩云陶潛彭澤五株柳潘岳河陽一縣  
花兩處爭如陽朔好碧蓮峰裏住人家觀此山水可

知同  
前

淮陰廟題者甚多惟錢諫議昆詩最佳築壇拜日恩雖  
厚躡足封時慮已深隆準早知似烏喙將軍應有五

湖心

青箱  
雜記

歙州問政山聶道士所居嘗有人陟險攀蘿至絕壁於  
巖下嵌空處見題詩一首雖苔蘚昏蝕而文尚可辯

題云黃台詞不知台何人也千尋練帶新安水萬仞  
花屏問政山自少雲霞居物外不多塵土到人間壺  
懸仙島吞舟罷椀浸星宮咒水間寶錄篋垂金綬帶  
絳囊條鎖玉連環靜張棋勢鋪還打嘿考仙經補又  
刪牀並葛鞋寒兔伏窗橫樗儿老龍跽溪童乞火朝  
敲竹山鬼聽琴夜撼櫟草暗碧潭思句曲松昏紫氣  
度涵關龜成淺甲毛猶綠鶴化幽翎頂更殷阮洞神  
仙分藥去蔡家兄弟寄書還黃精苗倒眠青鹿紅杏

枝低掛白鷗容易煮茶供客用辛勤栽果與猿攀常  
尋靈穴通三島擬過流沙化百蠻新隱漸開侵月窟  
舊林猶悅枕沙灣手疏俗禮慵非傲肘護靈方臂不  
慳海上使頻青鳥黠篋中藏久白驢頑筇枝健杖葛  
蒲節笋憤高簪玳瑁斑花氣薰心香馥馥澗聲聆耳  
冷潺潺高墳自掩浮生骨短晷難窮不死顏早晚重  
逢蕭塢客願隨芝蓋出塵寰台國初時任屯田員外  
郎世有全篇

荆門軍玉泉山寒泉亭題者甚多有一篇最佳而忘其姓名詩云朔風凜凜雪漫漫未是寒時分外寒六月

火雲天不雨請君來此倚闌干

雲齋  
廣錄

張宗尹爲長安令時鄭州陳相尹京兆宗尹嘗以事忤公意公有別業在鄆杜間宗尹書一絕於壁云喬松翠竹絕纖埃門對南山盡日開應是主人貪報國功成名遂不歸來有人錄以告公覽而善之待之如初宗尹嘗有詩云大書文字隄防老刺買田園准備閒



倦游  
錄

臨潼縣靈泉觀唐清華宮也自唐迄今題詠不可紀小  
杜五言長韻并三絕泊鄭愚津陽門詩外唯陳文惠  
張文定及進士楊正倫詩最佳文定詩云當時不是  
不窮奢民樂昇平少嘆嗟姚宋未亡妃子在塵埃那  
得到中華文惠詩云百首新詩百意精不尤妃子只  
尤兵爭如一句傷時事只爲明皇恃太平正倫詩曰  
休罪明皇與貴妃大都哀盛兩相隨惟憐一派溫泉

水不逐人心冷暖移又鄭文寶詩云只見開元無事  
久不知貞觀用功深皆爲知音所賞

鄜州東百里有水名思河傳舍曰相思舖令狐楚詩  
曰誰把相思號此河塞垣車馬往來多只應自古征

人淚灑向空洲作碧波

並同前

韓魏公自中書出相州於居第作狎鷗亭永叔以詩寄  
曰豈止忘機鷗鳥信鈞陶萬物本無心魏公喜曰余  
在中書進退升黜未嘗置心於其間永叔可謂知我

古今

詩話

呂文靖詩曰賀家池上天花寺一一軒窗向水開不用  
閉門防俗客愛閒能有幾人來賀家池即賀監所賜  
之湖詩後爲風雨所損惜乎寺僧不留

雜誌

唐人徐凝多吟絕句曾吟廬山瀑布詩云瀑布泉瀑布泉千  
丈直雷奔入江無暫息今古長如白練飛一條界破  
青山色題處州縉雲山鼎湖詩云黃帝旌旗去不回  
空遺片石碧崔嵬有時風捲鼎湖浪散作青天雨點

來後無題者

郡閣  
雅談

權審常侍著詩千首常題山院曰萬葉風聲利一山秋

氣寒曉霜浮碧瓦落日度朱欄

貢父  
詩話

江南道士任右元能篆見人題常州忠烈王廟詩一絕

云松竹蕭蕭野笛悲寂寥冰雪對旌旗前山月夜陰

風起神去神來人不知時人不會其意尋毀其碑元

厚之篆於石后愈無識者因此漫滅

郡閣  
雅談

鄧仙客死葬麻姑山人謂尸解遊人題詩多矣有一少

年一絕不言姓名但云天嶠遊人詩曰鶴老芝田雞  
在籠上清那與世塵同既言白日昇天去何事人間

有殯宮鄧名稍減

雲溪友議

三鄉題不知誰氏題云余本家若耶溪東從良人西入  
幽關寓居新昌里第不幸良人已矣邈然無依東邁  
歷渭川涉滙水背終南涉太華經號略抵陝郊皆曩  
昔讌遊之地命筆輒題終不能滌其懷抱翰墨非女  
子事故隱其名而不書爲詩曰昔逐良人西入關良

人身沒妾空還謝娘衛女不相待爲雨爲雲過此山  
和詩十一首陸正洞云惆悵殘花怨暮春孤鸞舞鑑  
倍傷神清詞好箇干人事疑是文姬第二身王祝云  
女几山前嵐氣低佳人留恨此中題不知雲雨歸何  
處空使王孫見即迷劉谷曰蘭蕙芬芳見玉姿路傍  
花笑景遲遲亭蘿山下無窮意併在三鄉惜別時王  
條云浣沙遊女出關東舊跡新詞一夢中槐陌柳亭  
何限事年年回首向東風李昌鄴云紅粉蕭娘手自

題分明幽怨發雲閨不應更學文君去泣向殘花歸  
剡溪王顧云無姓無名越水濱芳詞空怨路旁人莫  
教才子偏惆悵宋玉東家是舊鄰李繪云會稽王謝  
兩風流王子沉淪謝女遊歸思若隨文字在路傍空  
爲感千秋張碕云洛川依舊好風光蓮帳無因見女  
郎雲雨散來音信斷此生遺恨寄三鄉高衢云南北  
千山與萬山軒車誰不念鄉關獨留芳翰悲前迹陌  
上恐傷桃李顏章冰云來時歡笑去時哀家國迢迢

向越臺待寫百年幽思盡  
故宮流水莫相催  
賈馳五言云  
壁古字未滅  
聲長響不絕  
蕙質本如雲  
松心應奈雪  
耿耿離幽谷  
悠悠望甌越  
杞婦哭夫時  
城摧無

此說

雲溪友議

吳門女郎真娘死  
墓虎邱山時人比之蘇小小  
行客題墓多矣  
舉子譚銖題云  
虎邱山下塚  
纍纍松柏蕭條  
盡可悲  
何事世人唯重色  
真娘墓上獨留詩

鄭仁表經滄浪峽  
憇於長亭亭吏持牌乞詩  
題曰分峽



東西路正長行人名利火焚湯路傍看箇滄浪峽真

是將閒攪攪忙

撫言

蜀道有飛泉亭留詩甚多薛能佐李公過蜀道題云賈  
掾曾經去題詩豈易哉悉打去詩板獨留李端巫山

高一篇

同前

元祐五年同景文義伯聖徒次元題竹上云結根豈殊

衆脩柯獨出林孤高不可恃歲晚風霜侵

百斛明珠

余初謫嶺南過田氏小園東門一峰豐下銳上俚人謂

之鷄籠山余更名曰獨秀峰今過之留詩云倚天巉  
絕玉浮圖肯與彭郎作小姑獨秀江南知有意要三

山別四方壺

玉局  
文

慈恩寺塔有唐人盧宗回一詩云東來曉日上翔鸞西  
轉蒼龍拂露盤渭水冷光搖蕩井玉峰晴氣壓闌干

古今  
詩話

江州琵琶亭題者惟夏鄭公梅公儀詩佳夏詩曰年光  
過眼如車轂職事羈人似馬嘶若遇琵琶應大笑何

煩涕淚滿青衫梅詩云陶令歸來爲逸賦樂天青宦  
起悲歌有絃應被無絃笑何況臨絃泣最多又葉氏

女郎詩云樂天當日最多情淚滴青衫酒重傾明月

滿船無處問更聞商婦琵琶聲

古今  
詩話

河中鶴鵲樓唐人詩極多唯王之渙李益暢當詩最佳王云

白日依山盡黃河入海流欲窮千里目更上一層樓

李云鶴鵲樓前百尺墻煙汀雲樹共茫茫漢家蕭鼓

沉流水魏國山河半夕陽事去千年猶恨短愁來一

日即知長風煙併在相思處滿目非春亦自傷暢詩

云天勢圍平野河流入斷山

同前

李建中恬退作詩清淡望湖樓詩云小艇閒撐處湖天

景亦微春波無限綠白鳥自由飛落日孤鴻遠輕煙

古寺稀時攜一壺酒戀到晚涼歸西湖詩云漲煙春

氣重貯月夜痕深皆此類

古今詩話青箱雜記謂望湖樓詩是蕪爲湖州作

潘邠老有登漢陽江樓詩云兩屐上層樓一目略千里

說者以爲着屐豈可登樓

直方詩話

陸蟾寓居潭州攸縣司空山好神仙事多辟穀累月題  
廬山瀑布云正源人莫測千尺掛雲端岳色染不得  
神功裁亦難夏噴猿鳥浴秋射斗牛寒流到滄溟日  
翻濤更好看又春暮經石頭城云六朝多少事揩肘  
思悠悠落日空江上子規啼渡頭蕪葭侵壞壘煙霧  
接滄洲今古分明在那堪向九秋雍熙中服藥卒

雅言

雜載

李宏皋唐末八座善夷之子善夷左遷武陵宰卒於官

宏皋昇櫬歸故園途中值兵革爲馬氏擁入湖湘文  
昭王有功授學士至刑部侍郎每牋奏至京辭臣降  
歎李崧相國器之後馬氏兄弟結隙與弟宏節俱棄  
市少攻詩題桃源云山翠參差水渺茫秦人昔在楚  
封疆當時避世乾坤窄此地安家日月長草色幾經  
壇杏老巖花猶帶澗桃香他年倘遂平生志來着霞  
衣侍玉皇

任鵠字射已富有學問題君山云不得揚帆路盤根壓

洞庭煙中四面白雲外一堆青魚躍晴波動龍歸石  
洞腥纔期託名畫爲我簇爲屏送王正已歸山云五  
峰青拄天直下掛飛泉琴鶴同歸去煙霞到處眠  
跳霜葉徑虎嘯夕陽川獨酌應懷我排空樹影連

前

韓常侍爲郎吏日宣宗問曰卿有好詩如何得見韓稽  
首曰容至私第錄進乃選八十首進後以眼疾辭拜  
珥貂爲御史銜命出關讞獄道中看華山有詩曰野

麋蒙象暫如犀心不驚鷗角駭雞一路好山無伴看

斷腸煙景寄猿啼

御史出使不得與人同行故云無伴

時補袞謝病歸

山更寄織錦篇與薛郎中云錦字龍梭織錦篇鳳凰

文采間非煙並他時世新花樣虛費工夫不直錢和

人憶鶴云拂拂雲衣冠紫煙已爲丁令一千年留君

且伴居山客幸有松梢明月天又和憶山泉云情多

不似家山水夜夜聲聲旁枕流

古今詩話

少游在黃州飲於海橋橋南北多海棠有老書生家海





詩話總龜卷十五

欽定四庫全書

詩話總龜卷十六

宋 阮閱 撰

留題門 下

松江新作長橋制度宏麗前世所未有蘓子美長橋對  
月云雲頭熖熖開金餅水面沉沉卧彩虹時謂此橋  
非此句雄偉不能稱也子美兄舜元字才翁詩律道  
勁而獨罕傳與子美登紫閣聯句無愧韓孟恨不盡  
見之

李古少貧賤一舉成名不二十年自副樞密除本州刺

史有登祝融峰云欲上祝融峯先登古石橋鑿開巖

嶮處取路到丹青

南唐近事

陳誼吉州人題螺江廟云廟裏杉松蕭颯風廟前江水

碧溶溶凭闌不見當時事落日遠山千萬重太平興

國中史館學士張齊賢出為本道轉運使至其廟覽

留題詩牌甚多俱打去獨留誼詩方知名

郡閣雅談

郢中寺壁有鄭文寶詩親筆寒食訪僧舍云客舍愁經

百五春雨餘溪寺綠無塵金花何處鞦韆鼓粉頰誰  
家鬪草人水上碧桃流片段梁間歸燕語逡巡高僧  
不飲客攜酒來勸先朝放逐臣

古今  
詩話

章碣題焚書坑云竹帛煙銷帝業虛昔年曾是祖龍居  
坑灰未冷江東亂劉項元來不讀書

舒州三祖山因芟薙蘿蔓峭壁間得詩乃杜牧之金陵  
懷古云玉樹歌殘王氣終景陽鐘動曉樓空楸梧遠  
近千家樹木黍高低六代宮石燕拂雲晴亦雨江豚

吹浪夜還風英雄一去豪華盡惟有青山似洛中

范文正謫睦州過嚴陵釣臺作詩曰漢包六合網英豪  
一個冥鴻惜羽毛世祖功臣三十六雲臺爭似釣臺

高

繁知一聞樂天將過巫山先於神女祠粉壁大書曰蘇  
州太守真才子行到巫山必有詩為報高唐神女道  
速排雲雨待清詞白公見詩邀知一日劉夢得禮白  
帝欲留一詩於此怯而不敢罷郡經過悉去詩千餘

首只留四篇沈佺期曰巫山高不極合沓狀奇新閣  
谷疑風雨幽崖若鬼神月明三峽曉潮落九江春為  
問陽臺客應知入夢人王無兢曰神女向高唐巫山  
下夕陽徘徊作行雨婉孌逐荆王電影江前落雷聲  
峽外長霧雲無處所臺館峙蒼蒼李端曰巫山十二  
峯皆在碧虛中迴合雲藏日霏微雨帶風猿聲寒渡  
水樹色遠連空愁向高唐去千秋見楚宮皇甫冉曰  
巫峽見巴東迢迢出半空雲藏神女館雨到楚王宮

朝暮泉聲落寒暄樹色同清猿不可聽偏在九秋中  
金陵賞心亭丁晉公建也秦淮絕致公以家藏袁安卧  
雪圖張於其屏乃唐周昉筆經十四守無敢覬覦者  
後為太守竊去以几筆畫蘆鴈易之王密學琪來作  
守登臨賦詩曰千里秦淮在玉壺江山清麗壯吳都  
昔人已化遼天鶴舊畫難尋卧雪圖冉冉流年去京  
國蕭蕭華髮老江湖殘蟬不會登臨意又噪西風入  
座隅此詩乃切竊畫者蕭斧也

同前



蘓州崑山縣惠聚寺殿基乃鬼神一夕砌成殿中有僧  
繇畫龍每因風雨夜騰趕波濤傷田害稼鄉人患之  
僧繇再畫一鎖鎖之仍畫一釘釘其鎖至今人捫其  
釘頭尚隱隱唐乾寧初吳都崔融善五言題惠聚云  
人莫嫌山小僧還愛寺靈殿高神氣力龍活客丹青

前同

丁晉公舊有園在保康門外園內有仙遊亭仙遊洞與  
道士劉道往來道作仙遊亭詩贈公云屢在仙遊亭

上醉仙遊洞裏杳無人他時鳴鶴歸滄海同看蓬萊  
島上春公莫曉其詩後公南遷遁往見公於崖方思

其詩知為異人也

古今詩話

洪州西山與滕王閣相對過客多留詩有僧覽之告郡  
守曰詩無佳者何不去之守愕然曰能作佳句乎因  
為詩曰洪州太白方積翠倚穹蒼幾夜碍新月半江

無夕陽

雅言雜載古今詩話此陳文亮詩亮因天下  
既定作詩云草鋪春渚闊兵偃塞垣荒或謂

陳希

夷作

真州即揚州之揚子縣古白沙鎮也祥符中丁晉公鑄  
聖祖天尊像遂為真州有儀真觀西一水縈迴南入  
大江號曰胥浦一日三潮俗云子胥解劍渡江之所  
觀之記載使者以像在舟日方午潮水忽至今有午  
潮張芸叟有詩云聞說仙鄉接瀨鄉閑遊詩侶禮虛  
皇三潮寶派通前浦萬葉靈杉蔽蜀崗天地杳冥供  
法像江山迴合助靈祥五雲送入蓬萊島留與人間  
作道場

金陵昇元寺即瓦棺寺也在城西隅前瞰江面後踞崇  
崗最為古跡累經兵火畧無彷彿李氏時昇元閣猶  
在乃梁時故物高二百四十尺太白所謂日月隱簷  
楹也

瓜州渡揚子橋介於江淮之衝南之瀟湘北走秦隴咸  
此取道古詩云揚子江頭楊柳春楊花愁殺渡江人  
數聲羌笛離亭晚君向瀟湘我向秦

元稹相廡問東浙七年因題東武亭曰役役閑人事紛

紛碎簿書功夫兩衙外留滯七年餘病痛梅天發親  
情海岸疎因循歸未得不是為鱸魚盧簡夫侍御曰

丞相不應鱸魚為好鑑湖春色春色謂劉采春

並同前

陳希夷題西峯云為愛西峯好吟頭盡日昂巖花紅作  
陣溪水綠成行幾夜碍新月半江無夕陽寄言嘉遯

客此處是仙鄉

翰府名談

陳希夷題華山云半夜天香入巖谷西風吹落嶺頭蓮

空愛掌痕侵碧漢無人曾歎巨靈仙

同前

王仲儀鎮真定惠愛在人罷日攀轅卧轍不得去題村  
寺曰寬猛三年無枉理公私兼濟不欺心如今受代

朝天去遮路人人淚滿襟

同前

裴晉公赴敵淮西題名於華嶽之闕門大順中戶部侍  
郎司空圖以一絕繼云岳前大隊赴淮西從此中原

息戰聲石闕莫教蒼蘚上分明認取晉公題

古今詩話

開元初鄭瑤經慈恩寺題云岸與恩同廣波將慈共深

涓涓勞日夜長似下流心

南部新書

郴州城東有山高秀神仙蘓耽修真之所唐封為蘓仙  
山觀有泉名曰橘泉元結詩曰靈橘無根井有泉世  
間如夢又千年鄉關不見重歸鶴姓字今為第幾仙  
風冷露壇人悄悄地閒荒徑草綿綿如何躡得蘓君  
跡白日霓旌擁上天沈彬詩曰眼穿林罅見郴州井  
里相逢側局楸味道不來閒處坐勞生更欲幾時休  
蘓仙宅古烟霞老義帝墳荒草木愁千古是非無處  
問夕陽西去水東流

撫遺

鄭毅夫題吳江長橋云插天蝮竦玉腰闊跨海鯨鯢金

背高

青瑣集

祝融留題甚多謝元云雲濕幽岩滑風流古木香僧棲  
岩云閒雲四邊盡浮世一齊低

羅隱留金山云老僧齋罷關門睡不管波濤四面生孫  
山云結宇孤峯上安禪巨浪間亦可亞張祐詩

潤州甘露寺有三賢亭乃劉備孫權曹操微時嘗會此  
羅隱詩云漢鼎未分聊把手楚醪雖美肯同心過者



心服焉

同前

衡州來陽有杜甫祠過客題詩多矣歐陽文忠公獨稱徐介之詩云手接汨羅水天心知所存故教工部死來伴大夫魂流落同千古風騷共一源消凝傷往事斜日隱顏垣

畿邑扶溝有白鶴觀向才翁子美壁間留題二絕周元郎中知是邑愛之作詩紀其美公卿知者韓衛公詩最佳詩云二蘓遺迹匿仙局賢宰重來為發明字久半

隨風雨駭氣豪猶入鬼神驚直疑鸞鳳騫雲去不假  
江山到地清人對盛時須自勉酒豪顛草尚垂名

三閭大夫屈平字靈均沉沙之處汨羅江在岳州境內  
正廟以漁父配享唐末有洪州衙前軍將忘其姓名  
題一絕云蒼藤古木幾經春蕩祀祠堂小水濱行客  
謾陳三酌酒大夫元是獨醒人自後能詩者不敢措  
手

唐東京正平坊安國觀明皇朝玉真公主所建女冠多

上陽退宮嬙盧尚書有詩云夕照紗牕起暗塵青松  
遶殿不知春請看白髮誦經者半是宮中歌舞人

劇談

錄

唐相段文昌家江陵少以貧窶修進常患口食不給每  
聽僧口寺鍾輒詣謁食為寺僧所厭自此乃齋後扣  
鍾冀其晚留而不逮食後入登台座出連大鎮拜荆  
南節度使詩題曾口寺云曾遇閣黎飯後鍾蓋為此

北夢瑣言古今詩話載此詩是唐相王播題揚州佛  
寺有全篇云上堂已了各西東慚愧閣黎飯後鍾三

十年前塵土面而今始得碧紗籠  
今言段文昌乃江陵人所傳誤

懷素臺在郡東五里橫隴之上唐開元中有僧懷素居  
是臺學者因謂之懷素臺今有墨池筆塚存焉裴說  
有題懷素臺歌云我呼古人名鬼神側耳聽杜甫李  
白與懷素文星酒星草書星永州東郭有奇恠筆塚  
墨池遺跡在筆塚低低高高似山墨池淺淺深如海我  
來恨不已爭得青天化為一張紙高聲喚起懷素書  
搦管研朱點湘水欲歸家重歎嗟眼前只有三個字枯

樹槎烏梢蛇墨老鷄

零陵總記

白沙驛在永州一百二十里初陽縣下臨湘水西岸門外有亭以形勝盡在此也開寶初左補闕劉能奉詔之九疑維舟於此留詩云窻外秋聲湘瑟怨檻前竹色楚帆飛又云懶向九疑岐路望渡頭雲雨正霏霏法華寺在永州東南一里高阜之上城郭崗巒交相掩映唐咸通中有陀頭蔣氏愛其地乃拖鉗行丐獲金帛鉅萬以創寺焉名士無不留詠沈彬云地隈一水

巡城轉天約羣山附郭來又孟賓于匝地人家凭檻  
見遠山秋色捲簾看可謂盡其狀

朝陽岩在永州城西南一里餘元結所名也以其東向  
日先照故名杜陵有歌云朝陽岩下瀟水深朝陽洞  
中寒泉清零陵城郭夾瀟岸岩洞幽竒當郡城荒蕪  
自古人不見零陵徒有先賢傳水石為娛焉可忘長  
歌一曲留相勸又有牛叢詩云躡石攀蘿路不迷曉  
天風好浪花低洞名獨占朝陽號應有梧桐待鳳栖

瀟水在永州西三十步自道州營道縣九疑山中亦名  
營水湘水在永州北十里出自桂林海陽山中經靈  
渠北流至零陵北與瀟水合二水皆清泚一色高秋  
八九月雖丈餘可以見底自零陵合流謂之瀟湘經  
衡陽抵長沙入洞庭秦韜玉有詩云女媧羅裙長百  
尺搭在湘江作山色又云嵐光楚岫和空碧秋氣湘  
江到底清沈彬湘江行云數家漁網踈雲外一岸殘  
陽細雨中僧齊己瀟湘詩云二水遠難論從離到坎

奔冷穿千嶂陌清過幾州門又云月來無夜底雲度見秋痕何消有詩云鴈影數行秋半逢漁歌一聲夜深發皆曲盡其妙

浯溪在永州北百餘里流入湘江溪水石竒絕唐上元中總管經畧使元結罷任居焉以所著中興頌刻之崖石顏真卿書結復爲浯臺石堂西峯四厭亭銘皆刻于石崖上皇朝乾德中左補闕王伸知永州維舟於此留詩云湘川佳致有浯溪元結雄文向此題想



得後人難以繼高名長與白雲齊

淡塘在永州北三十里其水有九十九源昔有居人文  
潭好農務穀乃築塘以灌田百姓利之立碑紀其功  
霸國時碑猶在塘中長興初黃損為永州團練副使  
築為別業有詩曰傍水野禽通體白釘盤山果半邊

紅損去為居民劉氏所有

並同前

鷺羊山在長沙縣北二十里本名東華山亦謂之石寶  
山上有仙壇丹竈湘中別記云昔郡人成君平年十

五兄使牧鷺羊忽遇一仙翁相將入此山兄後尋至  
山中見君平因問所牧鷺羊何在弟拍白石曰此是  
也遂驅起令隨兄去旬日却還山下復化為石今猶  
存焉因名此山為鷺羊山畢田詩云羽客何年此鍊  
丹尚留空竈鎮孱顏雲中雞犬仙應遠山下鷺羊石  
轉頌湘渚幾因滄海變遼城無復令威還何年仙馭  
還來此盡遣飛騰上九關

幽間  
鼓吹

醉鄉湘中別記云後漢時有人在此鄉忽經醉經三晝

夜始醒猶有酒氣言與天神共飲乃示後任陽羨令  
每言歲之豐儉無不驗俄亦仙去畢田詩云三宿酣  
神耐鄉名因此呼山中十日者自合是仙都

同前

水簾朱陵洞口有泉自洞而去巨石橫峻壁立千仞一  
派飛下如紋簾之狀畢田詩云洞門千尺樹飛流玉  
碎珠聯冷噴秋今古不知誰捲得綠蘿為帶月為鈎

湘中  
故事

凝碧在南岳石橋上畢田詩云四面山屏疊萬重古嵐

濃翠鎖寒空，清秋獨倚危闌立。身在琉璃世界中。

擲鉢峯湘中山水記云：昔惠思禪師居般若臺，嘗擲鉢乘之赴陳帝詔。畢田詩云：應將鉢渡關神通，擲去乘將赴帝宮。爭似嶺頭提不起，于今相續闡真風。

石霜山寺南在溜陽縣南八十里，有崇勝禪寺。昔普惠禪師居衆千餘名，其堂曰枯木，蓋取其晏寂也。廉使丞相裴公嘗親枉大旆詣之，蓋留玉環象笏在此。迄今存焉。畢田詩云：石上泉華噴猛霜，境奇因此闢禪。

坊使君環笏留何用枯木千餘滿一堂

大哀州在湘陰縣西三十里圖經云昔舜南狩二妃尋  
之至此而聞舜葬於九疑博物志云舜崩於蒼梧二  
女以涕揮竹竹盡成斑畢田詩云玉輦南巡去不還  
翠娥望斷楚雲間波寒剩寫哀絃怨露冷偏滋淚篠  
斑一水盈盈傷遠目九峯巉巉慘愁顏荒洲千古淒  
涼地半掩空祠向暮山

神鼎山在湘陰縣東北絕頂有丹井於此獲藥鳥及巨

人跡云神仙所履之跡因此名為神鼎故畢田詩云  
玉趾分明印絕巔藥成仙去幾十年深藏寶鼎今方  
出合得丹經與世傳

香水湘中別記云在縣郭內其水甚香若合餘水即變  
昔年嘗貢此水民多困弊至齊末以來因廢罷以板  
覆之上起塔今猶存湘鄉本謂之湘香蓋由此而名  
列子曰壺頂有口名曰滋穴其水湧出名曰神瀆馨  
過椒蘭味過醪醴畢田詩曰坎上浮圖已拂天椒蘭

餘韻尚依然九重無復修常貢空有香名與邑傳

並同

前

鄧峯永庵王南禪師法子魯直恨不識有自慶者事永

甚久即以慶主黃龍叢林於慶改觀及與語多解體

山谷過永庵題曰奪得胡兒馬便休休嗟李廣不封

侯當時射殺南山虎仔細看來是石頭

冷齋  
夜話

東坡愛西湖詩曰若把西湖比西子淡粧濃抹也相宜


余宿孤山下讀林和靖詩句句皆西湖寫生時天姿

自然不施鉛華再作詩書壁曰長愛東坡眼不枯解  
將西子比西湖先生詩妙真如畫為作春寒小谷圖  
前輩訪人不遇不書壁東坡作行說不肯書牌惡其特  
地只書壁耳候人未至則掃墨竹荆公訪一高士不  
遇題曰牆角數枝梅凌寒獨自開遙知不是雪為有  
暗香來

潘大臨工詩城谷九喜之謝無逸以書問有新作否荅  
曰秋來景物件件是佳句恨為俗氣所蔽昨日滿林



風雨起題壁曰滿城風雨近重陽忽催租人至遂敗  
意止此一句奉寄聞者笑其迂闊



詩話總龜卷十六